

दिनांक 25.02.2025

समय: 18.45 बजे

- विधानसभा मांय सत्ता पख अर विपख बीचे रार और बधी-आज विपख री गैर मौजूदगी मांय सदन री कार्यवाही चाली।
- प्रदेश मांय राशन री पांच हजार दुकानां ने अन्नपूर्णा भंडार रा तौर ऊं विकसित करी जावेला।
- राजस्थान अध्यापक पात्रता परीक्षा-रीट 2024 री सगळी तैयारियां पूरी-पैली दफा उम्मीदवारां री पिछाण फेस रिकगनिशन तकनीक ऊं करी जावेला।
- राज्य मांय नुवा पश्चिमी विक्षोभ रा असर रे कारण 27 फरवरी ऊं बीकानेर, जयपुर अर भरतपुर संभाग मांय कठे-कठे हल्की बरसात रा आसार।

000

विधानसभा मांय सत्ता पख अर विपख रा सदस्यां बीचे रार हाल ई खत्म नी व्ही है ज्यों कारण आज सदन री कार्यवाही विपख रा सदस्यां री गैर-मौजूदगी मांय चाली। कांग्रेस रा प्रदेश अध्यक्ष गोविंद सिंह डोटासरा समेत निलम्बित सगळा विधायक सदन मांय दियो ज्यो धरनो काल खत्म कर दीनो हो। कांग्रेस रा विधायक आज सदन रा बाहर धरनो दीनो। खबरनवीसां सागे बातचीत करता थकां कांग्रेस रा आला नेता सचिन पायलट कह्यो के मंत्री ने वां रा कथित अपशब्दां माथे खेद जतावणो चाहिजे।

000

दूजी कानी संसदीय कार्यमंत्री जोगाराम पटेल खबरनवीसां सागे बातचीत करता थकां कह्यो के सरकार रार मेटण री कोशिसां कीनी, पण डोटासरा अड़ रह्या है। पटेल कह्यो के डोटासरा स्पीकर सारु जो शब्द काम लीना वे निन्दा करण लायक है।

000

प्रदेश मांय राशन री पांच हजार दुकानां ने अन्नपूर्णा भंडार रा तौर ऊं विकसित करी जावेला। खाद्य मंत्री सुमित गोदारा आज विधानसभा मांय आ जाणकारी दीनी। वे कह्यो के सरकार री ई बार री बजट घोषणा रा तहत आ पहल करी जावेला। श्री गोदारा बतायो के राज्य मांय उचित मूल्य री 25 हजार दुकानां ने डिजिटल बना दीरीजी है। खाद्य मंत्री बतायो के 1 करोड़ 6 लाख ऊं बत्ता राशनकार्ड धारी लोगां ने आंगळियां री पिछाण पाछे साफ़गोई सागे हर महीना राशन दियो जा रह्यो है। श्री गोदारा कह्यो के प्रदेश मांय अंत्योदय योजना रो फ़ायदो लेवण वाळा पिरवारां ने ई अन्नपूर्णा भंडार रे मार्फत शक्कर मुहैया करावण रा बारा मांय ई विचार कर्यो जावेला। डीडवाना रा विधायक यूनस खान रा सवाल रा जवाब मांय श्री गोदारा कह्यो के वक्फ बोर्ड मांय कांग्रेस रा राज मांय व्ही कथित माली गड़बड़ियां री जांच कराई जावेला।

000

चिकित्सा अर स्वास्थ्य विभाग मांय जीएनएम रा 2 हजार 338, एएनएम रा 3 हजार 58 अर सीएचओ रा 5 हजार 261 ओहदां माथे संविदा रा आधार ऊं भर्ती करी जा रही है। चिकित्सा अर स्वास्थ्य मंत्री गजेंद्र सिंह खींवर आज विधानसभा मांय प्रश्नकाल रे दौरान पूछी ज्या पूरक सवालां रा जवाब मांय आ जाणकारी दीनी। वे कह्यो के राज्य सरकार संविदा माथे काम करण वाळां री नौकरी पक्की करण री प्रक्रिया माथे ई काम कर रही है। मंत्री बतायो के पैली संविदा कर्मचारियां री नौकरी पक्की करण सारु 15 साल री संविदा आधारित नौकरी रो प्रावधान हो जिण ने डेढ़ साल पैली ई नुवा नियम बना र 9 साल कर दीरीजी ही। इण ऊं पैली विधायक डॉ. जसवंत यादव रा मूल सवाल रा लिखित जवाब मांय चिकित्सा अर स्वास्थ्य मंत्री कह्यो के एनएचएम रा तैत राजस्थान कॉन्ट्रेक्टुअल हायरिंग टू सिविल पोस्ट्स रूल्स 2022 रा 39 हजार 579 ओहदा मंजूरशुदा है।

000

प्रदेश मांय मुख्यमंत्री वृक्षारोपण अभियान रा तैत चालू माली साल मांय 7 करोड़ पौधा रोपण रा लक्ष्य ऊं 22 लाख पौधा बत्ता रोपी ज्या है। वन राज्यमंत्री संजय शर्मा विधानसभा मांय आ जाणकारी दीनी। वे बतायो के वन विभाग री ओर ऊं 80 हजार हैक्टेयर जंगलात जमीं माथे अढाई

करोड़ पौधा रोपी ज्या, जदके न्यारा—न्यारा महकमां, गैर—सरकारी संगठनां अर जनता कानी ऊं 4 करोड़ 72 लाख ऊं बत्ता पौधा रोपी ज्या।

000

लोकसभा अध्यक्ष ओम बिरला आज वां रा संसदीय हलका कोटा—बूंदी रा कोटखावदा मांय एक स्कूल रो उद्घाटन कीनो। ई मौके श्री बिरला कह्यो के भारत री वसुधैव कुटुम्बकम् री सोच आं सगळां रो विकास अर भलो तैय व्हे है।

000

इण ऊं पैली लोकसभा अध्यक्ष बूंदी जिला रा करवर गांव मांय पैली वाळा विधायक प्रभुलाल करसोलिया री मूरत रो अनावरण कीनो।

000

राजस्थान माध्यमिक शिक्षा बोर्ड री ओर ऊं 27 अर 28 फरवरी ने राजस्थान अध्यापक पात्रता परीक्षा—रीट 2024 ली जावेला। बोर्ड रा प्रशासक महेश चन्द्र शर्मा बतायो के तीन पारियां मांय ली जावण वाळी ई परीक्षा सारू एक हजार 731 केन्द्र बणायी ज्या है। रीट परीक्षा देवण सारू 14 लाख 29 हजार उम्मीदवार नाम मंडाया है। बोर्ड रा प्रशासक बतायो के इम्तिहान मांय नकल रोकण अर साफगोई बधावण सारू केन्द्रां माथे सीसीटीवी रे निगराणी राख्यी जावेला। ई इम्तिहान मांय बोर्ड री ओर ऊं पहली दफा चेहरा ऊं पिछाण री तकनीक काम ली जावेला। रीट रो इम्तिहान देवण सारू जावण वाळा नौजवानां रा सुबीता बाबत् रेलवे री ओर ऊं खास गाड़ियां चलायी जा रही है। उत्तर—पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के अ गाड़ियां काल ऊं 28 फरवरी ताई चालेला।

000

प्रदेश मांय एग्रीस्टैक योजना रा तैत किसानां री 11 अंकां वाळी विशिष्ट डिजिटल फार्मर आई.डी. बणायी जा रही है। ई बाबत् ग्राम पंचायतां मांय किसान रजिस्ट्री शिविर लगाया जा रह्या है। आवता बगत मांय इण ई आई.डी. रा आधार ऊं किसानां ने न्यारी—न्यारी योजनावां रो फायदो दियो जावेला। झुंझुनूं जिला मांय खेतड़ी उपखंड रा नांगलिया गुजरवास गांव मांय आज शिविर लगायी ज्यो।

000

कोटपूतली—बहरोड़ जिला री ग्राम पंचायतां मांय लगाया जा रह्या फार्मर रजिस्टर शिविरां रो जिला कलेक्टर कल्पना अग्रवाल दौरा कर र व्यवस्थावां रो जायजो लीनो।

000

निर्वाचन विभाग रा कामकाज अर लोकसभा अर विधानसभा री चुनावी प्रक्रिया रा बारा मांय भ्रम फैलावण वाळी अर गलत खबरां ने रोकण सारू असरदार कार्यवाही करी जावेला। राज्य रा मुख्य निर्वाचन अधिकारी नवीन महाजन ई सारू सगळा जिला निर्वाचन अहलकारां ने हुकम दीना है। श्री महाजन निर्वाचन विभाग मांय प्रिंट, इलेक्ट्रॉनिक अर सोशल मीडिया रे जरिये प्रसारित करी जावण वाळी चुनाव संबंधी जाणकारियां री निगरानी सारू राज्य स्तर माथे चार सदस्यां री मीडिया मॉनिटरिंग अर क्रियान्वयन समिति बणायी है।

000

प्रदेश मांय 27 फरवरी ऊं 1 मार्च ताई पश्चिमी विक्षोभ रा असर ऊं बीकानेर, जयपुर अर भरतपुर संभाग मांय केई ठौड़ां अर शेखावाटी हलका मांय कटे—कटे हल्की बारिश रा आसार है। बीकानेर संभाग मांय आज अर काल ई कटे—कटे हल्की बरसात री संभावना है। ई बीच घणखर ठौड़ां दिन अर रात रा तापमान मांय 2 ऊं 5 डिग्री सेल्सियस ताई री बढ़ोतरी दर्ज करी ज्यी। लारला 24 घंटां मांय सब ऊं बत्तो 35 डिग्री सेल्सियस तापमान बाड़मेर मांय रह्यो। जैसलमेर, जालौर अर जोधपुर मांय तेज धूप रही अर पारो 33 डिग्री सेल्सियस ने पार कर ग्यो।

000

काल महाशिवरात्रि मनायी जावेला। ई मौके मिंदरां अर शिवालयां मांय अभिषेक सारू खास तैयारियां करी जा रही है अर आज ही धार्मिक आयोजन सारू व्हे गया है। महाशिवरात्रि रे मौके शिवालयां मांय सोहवणी सजावट करी ज्यी है। शिवरात्रि रे मौके केई ठौड़ां मेळा, शोभायात्रा अर भंडारा—प्रसादी रा कार्यक्रम व्हेला। राजधानी जयपुर मांय गलताजी हलका रा मिन्दरां समेत खास शिवालयां मांय ई जातरुआं री मोटी तादाद माथे काबू करण अर हिफाजत रा खास इंतजाम कर्या जावेला। मुख्यमंत्री भजनलाल शर्मा जनता ने महाशिवरात्रि री शुभकामनावां दीनी है। वां रा संदेश

मांय श्री शर्मा कह्यो के भगवान शिव म्हां ने विपरीत हालात मांय ई नी डगमगावण री सीख देवे है।

000

अब खबरां महाकुंभ ऊं —

उत्तरप्रदेश रा प्रयागराज मांय 13 जनवरी ऊं चाल रह्या महाकुंभ मांय काल आखिरी महा स्नान व्हेला। शिवरात्रि रे मौके पवित्र स्नान सारु मोटी तादाद मांय जातरुआं रे आवण रा आसार ने ध्यान राखता थकां मेला प्रशासन री ओर ऊं सगळा ज़रूरी इंतजामात तैय कर्या जा रह्या है। ई महाकुंभ मांय हाल ताई 60 करोड़ ऊं बत्ता जातरु आस्था री डुबकी लगा चुक्या है।

000